

Date – 28/10/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Gauhati High Court chuan Bairabi leh Saikhawthlir inkara Teirei lui chung a lei dawh hna chu uluk taka an vil mek thu an sawi.**
- 2. Chief Minister Pu Lalduhoma chuan Kolasib a nursing school chu nursing college a hlan kai a ni dawn niin a sawi.**
- 3. External Affairs Minister Dr.S. Jaishankara chuan Mumbai khawpui chu khawvel huapin firfiakte dodalna entirtu khawpui a ni tawh a ti.**
- 4. Spain Prime Minister Pedro Sanchez chuan nizan khan ni thum cham turin India alo thleng.**

<><><>

HIGH COURT

Gauhati High Court chuan Bairabi leh Saikhawthlir inkara Teirei lui chung a lei dawh hna chu uluk taka an vil mek thu an sawi.

Tun hnai khan hemi chungchanga public interest litigation (PIL) ngaihtuahu Justice Nelson Sailo leh Justice Marli Vankung te thutna bench chuan Teirei lei chungchang hi an ngaihtuah a. He thila telna neite chu lei dawhna tihkhawtlai a nih chhan leh phalna awmte court-a thehluhna hun a pe leh a ni. Teirei lei dawh hna hi kum 2017 a thawk tanin thla 24 (kum 2) chhunga thawh zawh tura ruahman a nih lai-in tunah hian thawh zawh tur hun hi nakum May ni 31 thleng pawhseisak leh a ni. Teirei lei hi Kolasib district leh Mamit district inkalpawhna atana pawimawh em em a nih avangin lei dawh hna tihkhawtlai a nih avangin mipui-in nasa takin an tuar tawh a ni.

<><><>

RICE FOR REFUGEES

Mizoram sorkar Food, Civil Supplies & Consumer Affairs department hotute chuan Food Corporation of India (FCI)-in buhfai an la rawn pek chhuah loh avangin raltlante ei tur buhfai an a la thei rih lo niin an sawi.

FCS&CA department hotute chuan Myanmar leh Bangladesh atanga raltlan leh Manipur atanga humhimna zawnga Mizorama rawn lut mi sing li chuante tana sorkar laipui consumer affairs, food & public distribution (CAF&PD) ministry-in buhfai metric tonne 1,379 leh quintal 34 pek tura a ruahman chu FCI lamin an pek chhuah hun hunah Mizorama phurh luh dan tur leh district hrang hranga raltlante hnena pek chhuah dan tur buaipui a nih tur thu an sawi. Sorkar laipui-in raltlante tana buhfai metric tonne 1,379 leh quintal 34 hi cheng vaibelchhe 5 hu a ni a. Ministry of home affairs (MHA)-in a

sum hi a tum ang a CAF&PD hian FCI kaltlanga Mizoram sorkar hnena a pek tura tih a ni.

Hemi atan hian August ni 14 khan sorkar laipui hian hriattirna a chhuah tawh a, September ni 19 khan CAF&PD hian rawn ti chiang nawnin hemi ni atanga ni 60 (thla hnih) chhunga buhfai hi lak chhuah fel vek tura tih a ni chungin thla khat ral hnu-ah pawh FCI hian buhfai hi a la rawn pe chhuak ta lo a ni.

Buhfai hi FCI-in a pek chhuah a, Supply department-in a lak hunah home department nen tangrualin an mamawh ang zelin district hrang hrang bawrsap kaltlanga pek chhuah leh tur a ni a. Hriat theih hnukung berah Myanmar raltlan Mizorama awm hi mi 33,004 an ni a, Bangladesh raltlan hi mi 2,014 an ni a. Manipur atanga rawn lut la awm mekte hi mi 4,200 chuang hret an ni.

Sorkar laipui hian MNF sorkar lai khan raltlante tanpuina atan hian cheng vaibelchhe 3 a rawn pe tawh a, ZPM sorkar tharah hian cheng vaibelchhe 5 rawn pek turin a ruahman leh mek a ni.

<><><>

MIZO TERRITORIAL ARMY

Chief Minister Pu Lalduhoma chuan Defence Minister Rajnath Singh hnena Mizo hlang awmna Mizo Territorial Battalion din an dil chu sorkar laipui-in a bawhzui dawn a ni a ti.

He thu hi Inrinni tlai a CM Conference Hall-a chanchinbumite a kawmna-ah sawiin Chief Minister chuan Delhi a zin hmasak lamah Defence Ministry ah Scouts battalion din an dil thu a sawi a. Sawrkar laipuaia thuneitute nen an sawi tlanna-ah Scouts Battalion chu China ramri-a duty tur an nih avangin territorial army dil zawk turin an thurawn an pe tih sawiin Pu Lalduhoma chuan tun tuma Delhi a zinna ah Defence Minister Rajnath Singh hnenah a thlen leh thu a sawi a. Rajnath Singh chuan Mizo territorial army, Mizo hlang awmna din tura rawtna hi Cabinet Committee on Security thutkhawm leh hmasa berah putluh a tum thu a hrilh niin a sawi.

Pu Lalduhoma chuan an dil mek Mizo Territorial Army Battalion home and heart hi din a nih chuan Mizoram ramri-a duty tur leh Mizoram pawna tirhchhuah loh tur chi an ni tih a sawi baw.

<><><>

CM REFUTES

Mizorama BJP nen sorkar intawm siam a, deputy chief minister a BJP MLA pakhat chu deputy chief minister-ah lak luh a ni dawn ni awma sawi chu Chief Minister Pu Lalduhoma chuan thu dik lo a ni a ti.

BJP MLA Dr. K. Beichhua nena Delhi a zin duna BJP hruaitute hmu a puhna chungchanga chanchinbumite zawhna chhangin Pu Lalduhoma chuan Dr Beichhua nen hian an zin dun lo niin a sawi a. Nilaini zana Delhi-a Assam Rifles hotute nena inremna an ziahna a Dr Beichhua a lo tel ve a hmuh thu a sawi a. Hetah hian ZPM, MNF leh BJP MLA te pawh an tel niin a sawi. Assembly inthlan hnukung berah ZPM chu party mala sorkar siam thei turin

thlan tlin an ni a, party dang thawhpui an mamawh lo tih Pu Lalduhoma chuan a sawi a. He thil hi thuthang dik lo khawi atanga lo chhuak nge a nih pawh hriat loh a nih thu a sawi a ni.

Congress hruaitu leh minister hlui Pu John Rotluangliana chuan Zirtawpni khan Aizawla Congress Bhavan-ah Mizoram deputy chief minister a nei mai thei tih sawi a hriat thu a sawi a. An tih ngam loh chuan BJP in an hrek an hlau si a, indawrna a kal mek tih chiang takin a hre thawi niin Pu John Rotluangliana chuan a sawi a ni.

<><><>

CM TRIP

Chief Minister Pu Lalduhoma chuan Kolasib a nursing school chu nursing college a hlan kai a ni dawn niin a sawi.

Pu Lalduhoma chuan tun hnai a Delhi a sorkar laipui thuneitu hrang hrang an dawrna-ah Kolasib a nursing school chu nursing college a hlankai an remti a. Hemi tihpuitlinna atan hian cheng vaibelchhe 7 dah a nih thu an lo hrilh niin a sawi.

CM chuan village council te chan ve tur hun rei tak pek theih tawh loh pekna atan tunah hian cheng vaibelchhe 35 an rawn nawr chhuak niin a sawi a. Finance commission-in VC-te chan tur atana sum a ruahman thin kha a tang rei deuh a. Kum 2023-24 chin chauh an la la a. A hma lama Utilisation Certificate pek loh khan a dal a, a hnu lamah chuan la sanction zui leh zel tur a ni. Wildlife sanctuary a thawkte hian mite angin a hunah hlawh an la thei reng reng lo mai a, hei hi installment te te a sorkar laipui-in a rawn pek thin vang niin CM chuan a sawi a. Pawisa lah chu a lo thleng tlai thin si a. Chuvangin kum khatah installment 2-a siam turin an nawr a, installment khata a chanve ve ve ni turin an nawr a, chu chu remtihsakin tunah hian an hlawh tur second installment cheng nuai 152 an sanction nghal bawk niin a sawi.

Chhim lama thlawhna tumhmun din tura hma lak a nih dan sawiin Pu Lalduhoma chuan Buildwell private limited Noida amite nen an inbiak thu a sawi a. Anni hian a hmuna rawn enfiahin thlawhna tumhmun a siam theih dawn chuan anmahni senso in an rawn siam dawn a. An lo chhoh hunah inremnate siamin kalpui tum a nih thu a sawi bawk a ni. Hei bakah hian NBCC hovin an dawr thu CM chuan sawiin hmun engemawzatah tuikhuah tur an rawn en dawn niin a sawi a. A bik takin a biala Mat lui khuahna tur an rawn en dawn thu sawiin, tui in tur, kawlpheha siamna tur leh zinmite hipna leh sangha khawina atana ruahman tum a nih thu a sawi a. A ram leilungte drone hmanga endik tura lo chhoh thuai an tum thu an sawi tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theiha dah a ni

<><><>

EAM

External Affairs Minister Dr.S. Jaishankara chuan Mumbai khawpui chu khawvel huapin firfiakte dodalna entirtu khawpui a ni tawh a ti. Nimina Mumbai khawpuia chanchinbumite a kawmnaah he thu hi sawiin India chuan firfiakte laka khauh takin hma a lak a tul tih sawiin hun kal tawha a thil tihsual a ti nawn tawh tur a ni lo a ti a. Firfiakte lakah ngaihnamna awmloa hmalakna an sawi chuan an chungah na taka chet a tul a ni a ti a. India-in firfiakte laka a ngaihdan na takin a sawilang bawk a ni.

<><><>

SPAIN

Spain Prime Minister Pedro Sanchez chuan nizan khan ni thum cham turin India alo thleng. Pu Sanchez-a hi a nupui Begona Gomez chuan a rawn tawiam a. External Affairs Ministry thuchhuah danin tun tum hi Prime Minister Sanchez-a lo zin vawi khatna tur a ni a. Kum 18 hnua Spain Prime Minister lo zin leh hmasak ber a ni. Vawinah Prime Minsiter Modia leh Sanchez te hi an inkawm dawn a, hei bakah hian C-295 sipai thlawhna siamna tur TATA Aircraft Complex chu Vadodara ah an hawng bawk ang.

<><><>

PM

Prime Minister Narendra Modia chuan internet lama inbumna pakhat digital arrest chu a ngaimawh thu a sawi. Nimina Akashvani Mann Ki Baat programme ah he thu hi sawiin Prime Minsiter chuan hetianga inbumna hi chhui turin state sawrkar leh sawrkar laipua a chhuitu pawlten theihtawp an chhuah a ti bawk.

<><><>

METRO

Union Minister of Housing and Urban Affairs,Manohar Lal chuan India chu hun reiloteah khawvela metro network lian ber dawttu a ni dawn a ti.Gandhinagar-a Urban Mobility India Conference vawi 17-na kharnaah he thu hi sawiin Minister chuan mipuite veivahna tlo leh tha neih a pawimawh thu a sawi a. Sawrkarin hemi kawngah hian theihtawp chhuahin hma a la a ti a. Kum 10 kalta chungin metro hi km 725 siam anih thu sawiin tunah hian km 974 siam mek a ni a ti bawk.

<><><>